

Date – 29/06/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- Governor Dr Hari Babu Kambhampati an Remna Ni chuan Remna leh muanna, inpumkhatna leh hmasawna kawnga ke pen duhna a ti chiang a ti.
- Aizawl Bawngkawn, Durtlang kawng-a leimin avangin Bawngkawn, Durtlang kawng khar rih a ni.
- Ladakh-ah nizan khan Sipai nunchan zirnaa lui tui lian thut avangin sipai 5 an thi
- National Testing Agency chuan exam a cancel leh a tih khawtlaite exam hun thar a ti chhuak

<><><>

GOVERNOR

Governor Dr Hari Babu Kambhampati an Remna Ni chuan Remna leh muanna, inpumkhatna leh hmasawna kawnga ke pen duhna a ti Chiang a ti a. Remna Thuthlung Ziah Ni hi India ram ropui tak chanchin ziahnaah hmun pawimawh a chang reng tawh a ni a ti.

Aijal Club a, nimir tlaia Remna Thuthlung Ziah; hriatrengna hun leh lawmna ah thusawiin Governor chuan Remna a awm theihna tur te leh Mizoram tana hmalam hun êng zawk siam tura remna kawnga thawktu zawng zawngte chungah lawmthu a sawi a. Mizoram Peace Accord chu Mizoram tana beiseina eng leh midangte tan pawh, khawnvar anga Chiang taka hmuh theih beiseina eng leh entawn tur, Remna Thuthlung hlawhtling tluantling awm tlem te zing a mi a ni a ti.

Governor chuan Remna Thuthlung Ziah a nih theihna atana theihtawp chhuahtu te - Pu Laldenga, Mizo National Front (MNF) Founder President, Mizote tana hruaitu nih tling, Pu Lal Thanhawla, Chief Minister, Remna a awm theihna atana a lalthutthleng thawhsan tu leh Pu Lalduhoma, Chief Minister ni lai, khatih hun laia MNF leh India Sawrkar inkara palai hna pawimawh thawktu te an ngaihsan awm tih a sawi a. Pu Zoramthanga, Pu Ch. Chhunga leh Brig. T. Sailo, Mizoram Chief Minister lo ni tawhte pawhin he Remna leh muanna hlu tak a lo awm theih nan an thawh hlawk hle bawk tih a sawi a ni.

He hun hi Chief Secy Dr Renu Sharma leh President, The Aijal Club-in thu an sawi a,

Mizoram Peace Accord, 1986 hi India sawrkar leh Mizo National Front (MNF)-te kara Inremna Thuthlung, Mizorama helna, Kum 1966 atanga intan tihtawpna a ni a. He Document hming hi Mizoram Accord, 1986: Memorandum of Settlement tih niin June 30 Khan Pu Laldenga, MNF President, Pu RD Pradhan, Union Home Secretary leh Pu Lalkhama, Chief Secretary, Mizoram ten hming an ziah hnan a ni.

<><><>

CRIMINAL LAWS

Thla thar, July ni 1 atanga hman tan tura sawrkar laipuiin dan thar a siam, New Criminal Laws of India 2023-ah Gender Neutral awm tharin hei hian hmeichhe laka pawikhawihna thlen thei hremna chu mipa chauh ni tawhlo in hmeichhe tana hremna a siam belh.

Sawrkar laipui dan thar siam pathum zingah hian hmeichhe humhimna dan tha tak siam belh ni mahse Gender Neutral a rawn awm thar a, hei hian hmeichhe chungah pawikhawihna hrem turah mipa chauh ni tawhlo in hmeichhia te hremna a dah thar a, intluktlang zawkin dan thar hnuaiyah hman a ni dawn.

Govt Mizoram Law College Asst Professor P. Lalremruati chuan Akashvani corr in a kawmna ah Dan thar 3 tur chungchang hi sawiin he dan thar hi mipuiten ngaihven a, hriat ve a pawimawh a ti a, harsatna tawh hnuah chiah dan ngaihven loin Dan thar chu mi zawng zawng a huam zau thei ang bera siam anih avangin mipuiten hriat a pawimawh a ti a, Mizo zinga Court- a case lut tam ber chu a tawp khawk chin chiah anih avangin a tira dan hriat chu mipuite mawhphurhna anih angin harsatna tawh hnuah nilo in thil engemaw tih dawnah dan hre mi te zawh thin a pawimawh tih a sawi. (BYTE)

P. Lalremruati chuan dan tharah FIR thehluhin a thlen chin report chu Police ten ni 90 chhungin a thehluttu an hrilhhriat ve a ngai tawh dawn a ti a, heng bakah hian dan hmasa lama phal thin Court remtihnaa Ukil ten case kalpui mek an inhnuhdawh theihna chu tihtawp niin a tuartu hriatpuina tello in an in withdraw thei tawh dawnlo a ti a, Mimalin misual anlo manin a rang thei ang berin Police station hnai berah emaw police hnenah hruai tur ani tih dan awmsa chu darkar 6 chhunga hruai tur tia thlak ani a ti a, Court ah thuhretu a tangtute humhimna dan Witness Protection Scheme a awm tawh dawn a ti bawk.

Asst Professor chuan dan tharah Tunlai thiamna hman theih tawh tur chuan Police hnuchhui kawngah leh case chinfel kawngah hmasawna tam tak a awm dawn a ti a, dan hriatloh chhuanlam a tlin loh avangin mi tin te mahni himna tur dan ngaihven a pawimawh tih sawiin khawtlang, zirna in leh Kohhranah thleng pawh inzirtirna neih a pawimawh thu a sawi bawk.

Sawrkar laipuiin dan thar July ni 1 atanga hman tura a duan 3 chungchang sawihona hi Akashvani chuan kartin inrinni tlai dar 4 atanga dar 4:30 inkarah a ti chhuak thin a ni.

<><><>

DURTLANG ROAD BLOCK

Aizawl Bawngkawn, Durtlang kawng-a leimin avangin Bawngkawn, Durtlang kawng khar rih a ni.

Tukin khan Deputy Commissioner & Disaster Management Authority, Aizawl kaihhruainain AMC, G&M, PWD leh Department hrang hrang atanga mithiam te'n Joint Inspection an nei a, thil awm dan endik a nih lai hian lei tla leh mai thei a la awm avangin chhiatna thleng palah a awm loh nan kawng an khar nghal a ni.

Joint Inspection Team, a hmuna tlawhtute hian a hmun laitu Lalhruaisanga, Chawntlangpui, Lawngtlai District chu rang taka leimin chhunzawm thei laite tifai nghal turin an hriattir a, hna a thawh zawh velah Aizawl DC\DDMA hnuai Quick Response Team –te kaihhruainain a hmunhma hi tha takin khuh nghal tura ruahmanna siam a ni a, kawng kal tan a him tih a chian hnuah chauh kawng hi hawn ni se tih a ni.

<><><>

DY SPEAKER

Vawiin khan Assembly Dy Speaker Pu Lalfamkima chuan NH-54/6 huam chhunga RTP farm leh Sethawn inkar leh Kawnpui Quarry bula Kawng siam mek a tlawh a, Contractor chu chak zawka hna thawk turin a chah.

National Highway 54/6 huam chhung, Kolasib leh Kawnpui inkara RTP farm leh Sethawn khaw inkar leh Kawnpui Quarry bula Kawng chhe zual zual lai; ruah a sur changa lirthei tanna thin chu NHIDCL hnuai Contractor Pu C. Lalhluna, Aizawl chuan a thawk mek a, Helai hnathawktu Contractor hian nikum October thla khan Work Order hmu in, hnathawh hun chhung tura ruat thla 6 a zawh hnuah tunah hian hun pek belh ani in, Estimate Amount hi Cheng vaibelchhe 3 a ni.

Kawng chhia ah hian lirthei vei vak a tangkhan loh nan leh hnathawh a buai loh nan chhun lam ah Contractor in traffic duty a ruahman a, zan lamah Kolasib Traffic Police leh Kawnpui Police an in duty chhawk anga, Thingdawl YMA in an puibawm thin ang.

Assembly Dy Speaker Pu Lalfamkima chuan, Mizoram sorkar in Inkalpawhna Kawngpui a ngaih pawimawh thu sawiin, Mizorama Kawngpui pawimawh leh lun ber NH-54/6, Aizawl panna kawng ah hun reitak chhung lirthei kal velah harsatna a awm chu pawl a tih thu sawiin, hna enkawltu NHIDCL leh an hnuaia Contractor te chu mipuite mamawhna hria a, an hna uluk leh chak taka thawk tur a chah in, hun tiam chhungin an hna thawk zo ngei turin a chah bawk.

Dy Speaker hi Kolasib SP Pu David H. Lalthangliana; NHIDCL General Manager Pranab Sinha; Manager Shaksham Tayagi; PWD SDO ianhmingthanga; Kolasib District MJA hruaitute; Contractor aiawh leh party hruaitu thenkhat in an tawiaawm.

<><><>

PC PARTY PR

Peoples Conference Party, PC chuan sorkar kal ta leh tun sawrkar thar huang chhungah Aizawl Central Jail leh District Jail hrang hrangah a khât tawka Jail tàng tlanchhuak an awm fo mai chu venhimna lama sawrkar inthlahdah vangah an ngai tih an sawi.

Vawiina thuchhuah an siamah PC Party chuan tunhnaia Prison-Van atanga harsa lo taka drugs kaihnauiha tàng an tlanchhuah theihna chhan pawh venghimitute inthlahdah leh fimkhur tawk loh vang tih a chiang hle an ti a.

Heng bàkah hian District Jail hrang hranga Prison-Van te hi hlui tawh, thawm that ngai te, a thar ngaihtuah ngai te a nih tawh lai a, ngaihsak a hlawh tawk loh avanga Jail tang ten tlanchhuahna remchangah an hman phah taah an tih an sawi ngai bawk .

Hetianga samkhâi taka Jail - a tàng te an tlanchhuah theih fona chhan leh vang chiang taka chhui chhuak tur leh tunhnuah a thlen fo tawh loh nan theihtawp chhuaha tan la thar turin PC Party chuan Mizoram sawrkar an ngen tih an sawi a ni.

<><><>

ZORO

ZO Re-Unification Organisation (ZORO) General Headquarters, Aizawl chuan Zomi, Chinland Council/CNF/Chin Brotherhood te inkar a engemaw thu inhmuh fuh loh avanga buaina awm chu pawl a ti tih an sawi a. Heng unaute hi thlahkhat thisen a inzawm vek an ni a. ZORO chuan lungrual taka awm tur leh unau an nihna ti lang turin a duh a ni, an ti.

ZORO executive committee meeting in a lo rel tawh angin remna palai hna an thawk a, Zomi Re-Unification (ZRO) leh ZORO hruaitute inbiakna neih tawh a ni a. Chinland Council/CNF leh ZORO hruaitute inbiakna neih a ni tawh bawk a, ZORO hruaitute thlazar hnuaiah a hu hova inbiakna nei leh turin ruahmanna kalpui mek a ni a. Inbiakna hi a rang lama neih thuai tum a ni, an ti.

ZO Re-Unification Organisation (ZORO) chu khawvel hmun hrang hranga awm Zofate lungrual tak leh insuihkhawm theih nana hmalatu a ni an ti a. Zofate chu unau vek an ni a, unau inhmelhai a tha lo a ni tih hria a an inhmuh thiam lohna chhonzawm lova ti tawp turin an ngen tih an sawi. Zofate inkarah remna a awm theih nan ZORO chuan palai hna a thawh chhonzawm zel dawn a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zuiang. Tun tum ami hi episode 111-na tur a ni.

Tun tum hi Prime Minister term thumna atana a chelh leh hnua Mann Ki Baat hun a hman leh hmasak ber tur a ni a. Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>

INDIAN ARMY ACCIDENT

Ladakh-ah nizan khan Sipai nunchan zirnaa lui tui lian thut avangin sipai 5 an thi. Thudawn danin nizan khan Line of Actual Control bul Daulat Beg Ode-a sipaiten tank nunchan an zir a. Eastern Ladakh-a Saser Brangsa bula Shyok lui an kan lainn lui tui lian thut avangin chhiatna hi a thleng a. T-72 tank chu lui lian thut hian a la zui ta nia thudawn a ni. Chhanchhuah hna thawktute a hmunah hian thleng nghal mahse tui lian nasa avangin an thawk chak thei lo a. Tank-a chuang sipai panga an thih phah ta a ni. Indian Army chuan thuchhuah siamin sipai panga in nunna an chan chu pawl an tih thu an sawi a ni.

<><><>

NTA

National Testing Agency chuan exam a cancel leh a tih khawtlaite exam hun thar a ti chhuak a. UGC-NET June 2024 chu August ni 21 atanga September ni 4 thleng neih tur a ni a. CSIR-UGC-NET June 2024 Examination a hun tihkhawtlai pawh July ni ni 25 atanga ni 27 inkarah neih tur a ni a. Integrated Teacher Education Programme (ITEP) exam hunsawn pawh July ni 10 neih tur a ni ang a. All India Ayush Post Graduate Entrance Test 2024 chu a hun pangngai thlaleh ni 6 ah neih a ni ang.

<><><>